



REMARQUES

DE LA SAINCTE CITE' DE

HIERUSALEM, EN LAQUELLE L'ORDRE

sainct Iean a pris son origine.



Es Historiens qui ont escrit de la guerre sacrée d'Asie en leurs Histoires Orientales, disent que la terre de Promission & la ville de Hierusalem (en laquelle la Religion de sainct Iean a pris son origine) est située au milieu de la terre habitable, ainsi qu'un point de circonference qui respond à l'Afrique, à l'Asie, & à l'Europe.

*Psal. 75.
Operatus est
salutem in
medio terra.
Ios. 3.
Congregabo
omnes gentes
in valle Iosaphat
et discipulabo
eos ibi.*

Ce qui est demonsté par vn triple ourage du Souuerain ourier, regardant le genre humain par la creation, la redemption, & le dernier Jugement vniuersel.

Les deux premiers ont esté faits és susdits lieux, comme sera le dernier, qui se fera en la vallée de Iosaphat suivant le dire du Prophete Ios. 3.

Hierusalem a esté l'une des plus anciennes & nobles Citez de l'Orient, Metropolitaine & siege des Roys de Iudée; la plus chérie & aymée de Dieu; comme la prunelle de son œil; bien qu'elle ait esté habitée de toutes sortes de nations & de peuples barbares, Dieu n'a voulu permettre qu'elle ait esté longuement souillée des ordures du peché, & a châtié & affligé ses habitans vicieux.

Deuant la venue de Iesus-Christ pour cause de l'idolatrie, & pour les vices des enfans de Noë, de Salomon, & de Roboam son fils, elle a esté plusieurs fois sacagée, bruslée & destruite par diuerses nations, le Temple profané, les Roys faicts esclaves, auenglez, enchainez, & cruellement massacréz, & le peuple miserablement taillé en pieces, & mené en seruitude avec leurs femmes & enfans.

Et apres que le Sauueur a paru en la Iudée, pour auoir mis à mort le Fils de Dieu, & pour s'estre reuolté de l'obedience de l'Empire Romain, du temps de Caius Neron Empereur, lequel pour refréner l'insolence de cette nation peruerse & seditieuse, commit Vespasien l'un de ses Capitaines avec vne puissante armée pour les châtier: mais durant cette entreprise fut contraint de s'en retourner à Rome, ayant esté proclamé Empereur en competence avecque Vitellius, & remit sa charge & son armée à son fils Titus, pour poursuiure le voyage de Syrie & de Iudée, assiegea & prist la Cité de Hierusalem, & la fit demolir & razer iusques aux fondemens, où moururent onze cents mille Iuifs, & nonante sept mille amenez esclaves, septante-deux ans apres la venue de Iesus-Christ.

*A Natio
Christo.
72.*

138.

Et derechef 66. ans apres cette nation seditieuse, s'estant reuoltée du temps de Ælian Adrian Empereur des Romains, il en fut fait vn autre grand carnage, & vne grande partie de la Iudée ruinée, neantmoins ledit Empereur fit reedifier la Ville, & voulut qu'elle fut nommée de son nom Ælia, ordonnant qu'elle seroit habitée par les Chrestiens, qui pour lors accouroient en grand nombre en pellerinage pour visiter les Ss. lieux de nostre Redéption, & defendant qu'aucun Iuif n'y peut

habiter ce qui fut executé en l'an 138. apres la Natiuité de nostre Seigneur.

L'Eglise Chrestienne ne laissa pourtant d'endurer de grandes persecutions, & afflictions, iusques au tēps que Constatin le grand Empereur des Romains fut fait Chrestien, en l'a 320. lequel chassa l'Idolatrie de tout son Empire, amplifia grandement l'Eglise Chrestienne, vniuant l'Empire des Romains, avec ce luy des Grecs, aggrāditi & fit edifier comme à neuf la ville de Bisance qu'il nomma Constantinople, & de son temps fit merueilles en faueur du Christianisme. Comme aussi sa mere Helene qui fit le voyage de Hierusalem, trouua, & fit desenterer le bois de la sainte Croix, & reedifier le Temple de la Resurrection de nostre Seigneur, sur le mont de Caluaire, auquel elle fit mettre le bois de sa sainte Croix.

Et enuiron quarante ans apres l'Empereur Iulian l'Apostat, faignant d'estre Chrestien pour auoir l'Empire Romain & d'Orient, apres auoir esté nommé Empereur par le Senat à Constantinople, le 11. Decembre 361. se declara payen & persecuteur des Chrestiens, fit ouuir le Temple des Idoles fauorisoit les Payens, & les Iuifs, ausquels il donna licence de pouuoir reedifier le Temple de Salomon pour sacrifier à leur mode.

Mais Dieu protecteur du Christianisme, ne voulut permettre telle impieté, ruinant ce Temple par vn tremblement de terre qui brisa non seulement ce nouueau edifice, mais encores des vnit tous les fondemens restez de l'ancien Temple. Ce qui accreut, & exalta grandement la loy Euangelique, & le nom Chrestien, mais ceste persecution ne dura qu'enuiron deux ans cest Apostat d'Empereur ayant esté tué en Perse, en vne bataille le 28. Iuillet 363.

Après la mort de Iulian, l'Eglise Chrestienne demeura en paix, sous le gouuernement des Empereurs Grecs l'espace de 300. ans ou enuiron iusques au temps de l'Empereur Focas que Cosdroes Roy des Perfes, indigné contre luy d'auoir mis à mort le bon Maurice avec ses enfans & d'auoir vsurpé l'Empire des Grecs par tyrannie, plein de furie, dressa vne puissante armée contre Focas, passant en Syrie mist à feu & à sang toute la Iudée, prit par force la ville de Hierusalem, la saccoagea, tua nonant mille Chrestiens & emporta en Perse, le bois de la sainte Croix, Emmena prisonnier l'Euesque Zacharie & autres Chrestiens, & ce en l'an 604. ou enuiron.

Heraclius, Empereur de Constantinople successeur de Focas, 14. ans apres, avec vne autre puissante armee, alla en Syrie, & en Perse, combatit ledit Cosdroes, reportà le bois de la sainte Croix, le remit au mont Caluaire, dans le Temple de la Resurrection de nostre Seigneur en l'an 618.

En ce mesme tēps ou tost apres, les Sarrazins fortis d'Arabie, se rendirent Maistres de partie de l'Empire Grec, de la Syrie, & de l'Egypte, sous la conduite de Homar fils de Catha III. successeur de Mahomet Roy legislateur, ou plustost faux prophete des Arabes, & Sarrazins, saccoegerent toute la Iudée, prirent Hierusalem, & ne trouuerent personne qui leur peut faire resistance, l'espace de 480. ou 90. ans & plus qu'ils regnerent en Syrie, en Hierusalem, en Perse, en Egypte, & autres lieux.

Ledit Homar apres auoir pris Hierusalem, fit reedifier le Temple de Salomon de la façon qu'il est pour auourd'huy, estant avec tous ceux de sa fuite Arabes, infectez de la fausse doctrine de Mahomet leur prophete, & se resolut d'amplifier sa fausse doctrine & sa Religion par les armes.

Lesdicts Sarrazins, en ce temps permirent aux Chrestiens d'habiter en certains quartiers de la ville de Hierusalem, de restaurer leurs Eglises, Monasteres, Hospitaux, exercer la Religion Chrestienne, & d'auoir leurs Euesques en Hierusalem, pendant qu'ils eurent la domination sur icelle.

Ce qui est arriué, par la faueur & recommandation de quelques princes Chrestiens, particulierement de Charlemagne, Empereur de l'Occident enuers Aaron, Roy de Perse, Calif des Sarrazins enuiron l'an de nostre Seigneur 800.

Les successeurs dudit Aaron & les autres Califs d'Egypte, en firent de mesmes bien qu'ils fussent tous Sarrazins, ennemis & en guerre entre eux, pour quelques differents, sur des poincts de leur differente Religion.

Pendant lesquels differents, diuisions, & guerres desdits Sarrazins, les pauures

320.

361.

363.

604.

618.

800.

Chrestiens en Hierusalem, estoient fort tourmentez, estans quelquesfois sous la domination des Sarrazins de Perse, ou Califs de Baudras, autresfois sous la tyrannie des Califs d'Egypte, mais à la parfin, les Califs d'Egypte furent les vainqueurs pour vn temps, & se rendirent Seigneurs de la Monarchie de toute l'Afrique & de l'Egypte, de Hierusalem, d'Antioche, & d'autres Prouinces, iusques au temps de Salladin.

Lesdits Sarrazins d'Orient, c'est à dire, les Califs de Baudras tenoient la loy & les superstitions de Mahomet, & les Califs d'Egypte les traditions de Hally, oncle & ennemy de Mahomet.

1012. Mais sous le regne de Equen, Calif d'Egypte, né de mere Chrestienne, pour oster à ceux de sa secte l'opinion qu'il voulut fauoriser les Chrestiens, ou craignant de n'estre pas tenu vray disciple de leur grand Prophete Mahomet, ou Hally, se declara par les effectz cruel ennemy des Chrestiens, leur imposa nouueaux tributs, leur leua leurs solemnitez, finalement fit ruiner & destruire le Temple de la Resurrection de nostre Seigneur en l'an 1012. lequel auparauant par commandement de l'Empereur Constantin le Grand, auoit esté reedifié, & puis réparé aux despens de l'Empereur Heraclius, comme il a esté dit cy-dessus.

1048. Et par ainsi ledit saint Sepulchre demeura demoly la seconde fois par l'espace de 37. ans, iusques au temps de Constantin Monomaque Empereur de Constantinople, lequel par les prieres des Chrestiens qui habitoient en Hierusalem, du consentement d'Aber Calife d'Egypte, apres le decez de ce cruel Equen son pere, fit reedifier ladite Eglise du saint Sepulchre en l'an 1048. 51. an deuant la prise de Hierusalem par les Chrestiens.

1060. En l'an 1060. ou enuiron, comme vn torrent impetueux s'esleua certaine autre nation Turque, barbare, septentrionale, cruelle & vagabonde, pareillement infectée de la faulxe doctrine de Mahomet, laquelle apres estre chassée de Perse, se voyant en nombre presque infiny, prit les armes sous la conduite d'un Capitaine esleu par elle nommé Selduc qui fut leur premier Roy.

Et apres sous la conduite de Belfer leur second Capitaine, en peu de temps ils se rendirent maistres presque de toute la Perse, de la Syrie, & de l'Orient, assiegerent & prirent Hierusalem, passerent aux Prouinces de l'Empire, nonobstant que Romain furnommé Diogene Empereur de Constantinople, avec vne grande & puissante armée s'y opposast, & fist tous ses efforts pour luy resister: toutesfois le malheur fut tel qu'il fut vaincu, & pris prisonnier par les Turcs, seruant d'escabeau & de marchepied audit Belfer Roy des Turcs, qui luy donna apres congé de s'en retourner, pour raison de laquelle infamie ledit Diogene fust depose de l'Empire par les Princes Chrestiens de Constantinople, qui luy creuerent les yeux, l'estimant indigne de porter le sceptre & la Couronne imperiale.

Et toutes les Prouinces de la Syrie iusques à l'Hellepont, furent par lesdits Turcs en peu de temps occupées, & par ce moyen la sainte Cité de Hierusalem remise sous la domination de ces barbares Turcs, beaucoup plus cruels que les Sarrazins, Persans, & Egyptiens.

Pendant cette cruelle tempeste, les pellerins Chrestiens ne pouuoient faire le voyage de la Terre Sainte qu'avec de grandes fatigues & hazards de leur vie, estoient contrainsts de passer par les terres de leurs ennemis, pris prisonniers, meurtres, saccagez & volez, ne se pouuant conduire iusqu'en Hierusalem, qu'avec mille perils, necessitez & autres miseres, n'ayant pour tout que ce qui leur estoit donné par aumosne dehors ladite Cité & dans les Hospitiaux d'icelle. Les Turcs auoient pareillement delaisé la quatriesme partie de ladite Ville aux Chrestiens pour leur habitation, telle qu'ils auoient sous la seruitude des Sarrazins, en leur payant le tribut & autres impositions, quoy que beaucoup plus grandes & insupportables.

Et cette derniere persecution dura l'espace de trente-huict ans, iusqu'à ce qu'il pleust à la Diuine Majesté de faire deliurer ladite sainte Cité de telle seruitude Mahometane, se seruant d'un debile instrument de certain pellerin François, nommé Pierre Hermite, qui estoit allé en pellerinage visiter la Terre Sainte, homme de peu de prestance, neantmoins d'un grand iugement, & doué de rare vertu, Dieu ayant donné tant de force & d'efficace à ses parolles, & aux lettres qui luy furent données de la part des Chrestiens de Hierusalem, qu'elles furent suffisantes d'esmouoir &

faire refoudre le Pape Urbain II. François de nation, de se transporter en France, y faire tenir vn Concile general dans la ville de Clermont en Auuergne, l'an 1095. pour esnouuoir par sa presence le Roy de France, Philippes premier du nom, Hugues le Grand frere du Roy Philippes, le grand Godefroy de Botuillon, avec ses deux freres Baudouin & Eustache, & Baudouin surnommé du Bourc, leur parent, Estienne Comte de Bourgongne, les deux Roberts freres, l'vn Duc de Normandie, & l'autre Comte de Flandres, Raymond Comte de Thoulouze & de saint Gilles, Estienne Comte de Blois, Arpin Comte de Bourges, Guillaume fils du Roy d'Angleterre, Ademar Comte & Euesque du Puy en Vellais, Vicair general du Pape, pour le spirituel en certe armée, & autres Princes, Archeuesques, Euesques, & Prelats François, Italiens, & d'autres nations, de se croiser, & prendre les armes pour reprendre Hierusalem, & conquerir la Terre Sainte.

En l'an 1096. l'armée Chrestienne fut dressée & commença à marcher avec si grande multitude de gens & de nations Chrestiennes, qu'il sembloit que tout l'Occident s'en alloit en Orient sous la conduite de ce grand & genereux Capitaine Godefroy de Botuillon, Duc de Lorraine, General de toute l'armée Chrestienne, surpassant 300000. hommes de pied, & 100000. de cheual.

Et deuant qu'arriuer en Hierusalem, assiegerent & prirent les villes de Nicée en Bitinie, le 20. Iuin 1097. & l'année ensuiuant Antioche, le 3. Iuin 1098. apres l'auoir assiegée neuf mois, & autres Villes, Comtez, & Principautez d'Edesse; desfirent en bataille rangée Soliman Roy des Turcs, nepueu dudit Belfer, tuerent 40000. Turcs, vainquirent par vne autre bataille Corbona Capitaine General du Soldan de Perse, où fut tué 100000. Turcs ou Persans.

Après la prise de Nicée, le Calife d'Egypte se resolut d'envoyer assieger la ville de Hierusalem, par vn sien Capitaine nommé Elafdalio, autrement Emireius Prince de sa Milice en l'an 1098. & la prist; & pour la mieux defendre en chassa les Turcs qui l'auoient possédée l'espace de 37. ou 38. ans, comme dit est.

Finalemēt apres lesdits sieges & prises des Villes & Principautez susdites, l'armée Chrestienne arriua deuant la ville de Hierusalem, l'assiegea le 7. Iuin 1099. & la prit cinq sepmaines apres, le 15. Iuillet de la mesme année, le iour d'vn Vendredy à l'heure de None, du temps du Pape Urbain II.

Huict iours apres la prise de Hierusalem ou enuiron, Godefroy de Botuillon fut esleu Roy, mais il refusa le Diademe Royal, s'estimant indigne de porter la Couronne d'or, comme homme pecheur, où le Sauueur du monde auoit porté la Couronne d'espines trempée de son sang precieux.

Et ce Royaume de Hierusalem fut depuis possédé par huict Roys Chrestiens, qui se rendirent Maistres de Hierusalem, & de quatre grandes Principautez.

La premiere, fut le Comté d'Edesse en la region des Medes, autrement appellée Mesopotamic, scize entre deux fleuues.

La seconde, celle d'Antioche.

La troisieme, celle de Tripoly en la Prouince de Syrie Fenicie.

Et la quatrieme le Royaume de Hierusalem chef souuerain des autres, lequel a esté acquis aux Chrestiens par vne grande effusion de sang, & avec grandes peines & pertes desdits Chrestiens, l'espace de 88. ans qu'ils l'ont gardée, l'ayant perdué du temps de Guy de Lusignan en l'an 1187. le 6. Octobre, quelque temps apres (par nos pechez Dieu estant iustement courroucé contre nous) les autres Principautez retournerent sous la sujection desdits Turcs.

Ladite ville & Royaume de Hierusalem & les autres trois susdites Principautez furent reprises sur les Chrestiens par Saladin Souldan, & Roy d'Egypte & de la Syrie du temps du Pape Urbain III. 88. ans apres la conqueste desdits Royaumes & principautez par ledit Godefroy de Bouillon.